



Rho Menyuum Kawm Ntawv Tawm Ib Ntus

Student Suspensions

Raug tshem tawm tsev kawm ntawv ib ntus yog dabtsi?

Thaum tus menyuum ntsib teebmeem tim tsev kawm ntawv, lub tsev kawm tawv yuav tsum ua raws li txoj cai. Txhua koog tsev kawm ntawv yuav tsum muaj txoj cai txog kev qhuab qhia. Muab tau tus menyuum kawm ntawv rho tawm ib hoob xwb, ib hnub lossis ntau hnub. Yog pheej coj tus cwj pwm phem ntxiv mus, tej zaum yuav muab tus menyuum kawm ntawv nrho tawm ntawv. Nug koj tus menyuum lub tsev kawm ntawv kom lawv luam ib daim ntawv kevcai qhuab qhia rau koj. Paub cov cai koj tus menyuum muaj.

Yog koj tus menyuum muaj kev xiam oob qhab lossis tau kev kawm pab tshwj xeeb, nws muaj ib co kevcai ntxiv lub tsev kawm ntawv yuav tau ua raws li. Yog xav paub ntxiv, hu rau Minnesota Disability Law Center ntawm (612) 332-1441 lossis 1(800) 292-4150.



Tsev kawm ntawv qhuab qhia tau li cas?

Tshem Tawm: Tshem tus menyuum kawm ntawv tawm ntawm tej hoob lossis tej yam kev ua si. Qhov no tsis pub ntev dua 5 hnub.

Rho Tawm Ib Ntus: Tsis pub tus menyuum kawm ntawv mus kawm lub tsev kawm ntawm 1-10 hnub.

Rho Npe Tawm Kawm Ntawv Txog 12 lub Hlis: Tsis pub tus menyuum kawm ntawv mus tim nws lub tsev kawm ntawv, lossis lwm lub tsev kawm ntawv hauv koog tsev kawm ntawv, kom ntev tsis dhau 12 lub hlis.

Rho Npe Tawm Kawm Ntawv Xyoo Ntawd: Tsis pub tus menyuum kawm ntawv mus cuv npe lossis rov qab cuv npe kawm ntawv rau hauv ib lub tsev kawm ntawv kom tas xyoo ntawd.

Yuav nrog tsev kawm ntawv sib cam txog qhov rho tawm tsev kawm ntawv ib ntus lossis muab lawv tshem tawm mas nyuaj heev. Yog li ntawd, nws yog ib qho zoo tswv yim mus nrog tsev kawm ntawv sib tham los nrhiav lwm txoj kev kom tsis txhob raug rho tawm ib ntus lossis lwm yam kev qhuab qhia rau yam tom ntej. Tej yam xws li, pab tus menyuum kawm ntawv ntau dua, sib txuas lus nrog niam txiv kom zoo dua, lossis lwm txoj kev los kho nws tus cwj pwm. Yog koj ntseeg tias qhov kev qhuab qhia tsis yog raws li lub tsev kawm ntawv txoj cai, koj mus ua ib daim ntawv tsis txaus siab tau.

Tus cwjpwmm zoo li cas thiaj yuav qhuab qhia tau?

Muaj ntau yam cwjpwmm tsis zoo uas raug qhuab qhia tau. Ob yam uas pom heev tshaj plaws yog:


- **Sib Ntau** – Menyuam kawm ntawv raug qhuab qhia yog sib ntau, thawb, lossis chua. Tej zaum ob tug menyuam kawm ntawv xuas nrig sib ntaus yuav raug rho tawm ib ntus. Txawm hais tias leej twg yog tus pib ua ntej. Tej zaum tsev kawm ntawv yuav txiav txim rho tawm tus menyuam uas ua raug mob rau lwm tus menyuam.
- **Saib Tsis Tau** – Cov menyuam kawm ntawv uas saib tsis tau lawv tus xibfwb muaj feem raug rho tawm ib ntus. Ib tus menyuam kawm ntawv raug tshem tawm lossis rho tawm ib ntus yog tias nws tsis ua li tus xibfwb hais lossis pheej cam nrog tus xibfwb thiab siv lus phem.

Lub tsev kawm ntawv yuav tsum ua li cas thaum lawv rho kuv tus menyuam tawm ib ntus?

1. Cov neeg khiav haujlwm hauv tsev kawm ntawv sib sablaj ua ntej rho koj tus menyuam tawm ib ntus.

Tsev kawm ntawv yuav tsum:

- Kom koj tus menyuam ntsib nrog ib tug neeg khiav haujlwm hauv tsev kawm ntawv,
- Piav seb muaj povthawj dabtsi,
- Qhia koj tus menyuam tias vim li cas thiaj li muab rho tawm ib ntus, thiab
- Cia koj tus menyuam piav nws zaj.



Tej zaum lub tsev kawm ntawv yuav muaj rooj sib tham tom qab muab rho tawm yog hais tias nws muaj “kev phom sij txaus thiab tamsim ntawd” rau lwm cov menyuam kawm ntawv lossis koj tus menyuam.

Niam txiv **tsis** muaj cai tuaj koom cov rooj sablaj no. Tej lub tsev kawm ntawv xav kom niam txiv tuaj koom rooj sablaj. Lossis tej zaum lawv teem dua lwm lub sijhawm nrog niam txiv tham txog tus menyuam tus cwjpwmm. Yog sau ntawv thov ua ntej, niam txiv coj tau lwm cov neeg koom tes nrog tus menyuam lub neeg tuaj tau.

Rov hais dua, Yog koj tus menyuam muaj xiam oob qhab lossis tau kev kawm pab tshwj xeeb, nws muaj ib co kevcai ntxiv lub tsev kawm ntawv yuav tau ua raws li. Yog xav paub ntxiv, hu rau Minnesota Disability Law Center ntawm (612) 332-1441 lossis 1(800) 292-4150.

2. Muab lwm cov kev pab cuam kawm ntawv

Lub tsev kawm ntawv yuav tsum muab lwm cov kev pab cuam kawm ntawv rau txhua tus raug rho tawm ib ntus ntev tshaj 5 hnuv. Lwm yam kev pab cuam kawm ntawv yog tej yam xws li pab qhia ntawv, kawm ntawv online, kawm ntawv hauv tsev, lossis lwm yam kev pab cuam. Rau txhua yam kev raug rho tawm, lub tsev kawm ntawv yuav tsum muab sijhawm rau koj tus menyuam ua ntawv hauv hoob thiab “homework” cov ntawv hauv tsev thaum lub sijhawm raug tshem tawm kom koj tus menyuam thiaj li tsis poob qab nws cov hoob kawm ntawv.

3. Sau ntawv qhia koj

Lub tsev kawm ntawv yuav tsum sau ib daim ntawv rau koj tus menyuam qhia txog:

- Vim li cas thiaj raug rho tawm ib ntus,
- Ua li cas,
- Koj tus menyuam thiab lwm tus tim khawv hais li cas txog qhov ntawd,
- Ib txoj kev npaj yuav rov txhais koj tus menyuam rov tuaj kawm ntawv, thiab
- Ib daim ntawv sau qhia txog koj tus menyuam cov cai.

Koj tus menyuam yuav tsum tau daim ntawv no ua ntej lossis thaum lub sijhawm nws raug rho tawm ib ntus. Lub tsev kawm ntawv yuav tsum xa ib daim rau koj tsis pub dhau 48 teev tom qab rooj sablaj. Lawv yuav tsum hu xov tooj rau koj sai li sai tau tom qab qhov rho tawm ib ntus.



4. Nrhiav lwm txoj kev pab yog tias koj tus menyuam raug rho tawm ib thus ntau zaus

Yog koj tus menyuam raug rho tawm tshaj 10 hnuv tauj ib xyoo twg, lub tsev kawm ntawv yuav tsum ua li ua tau los ntsib koj ua ntej yuav muab rho tawm ntxiv. Thaum mus sib tham koj mam li nrog tsev kawm ntawv tham seb koj tus menyuam puas toobkas lwm yam kev pab lossis kev ntsuam xyuas.

Koj kuj hais tau kom lawv nrhiav kev sib txuas lus nrog koj zoo dua, lossis nrhiav lwm txoj kev los pab kho koj tus menyuam tus cwj pwm uas pheej ua rau nws ntsib teebmeem.



Nrhiav kev Pab

Yog koj tus menyuam raug qhuab qhia lossis tshem tawm hauv tsev kawm ntawv, hu rau koj lub hoobkas kevcai lij choj legal aid kom pab thiab nrhiav lwm qhov chaw pab ntawm 1(877) 696-6529, lossis tiv tauj Youth Law Project hauv Minneapolis ntawm (612) 332-1441.

Saib peb daim ntawv qhia tseeb [Thaum Koj Tus Menyuam Raug Rho Tawm Tsev Kawm Ntawv: Rho Tawm Tsev Kawm Ntawv](#).

Cov ntawv qhia tseeb yog qhia kom paub txoj kevcai xwb TSIS yog muab txwv yim txog txoj kevcai. Mus ntsib ib tug kws lij choj rau tswv yim. Tsis txhob siv daim ntawv qhia tseeb yog tias nws qub tshaj ib xyoo lawm. Nug peb txog cov hloov tshiab, daim ntawv qhia txog cov ntawv qhia tseeb, lossis lwm hom ntawv.

© 2025 Minnesota Legal Services Coalition. Luam tau daim ntawv no los siv rau tus kheej tsis ua lag luam thiab qhia kom paub xwb. Tagnrho lwm cov cai ceev tseg. Qhov lus sau no yuav tsum nyob rau txhua daim ntawv. Txwv tsis pub muab luam, faib, thiab siv ua lag luam.